

# Confess al product regional

La regenza grischuna vesa divers avantatgs en la producziun regionala

DAD ANDREAS CADONAU / ANR

■ **La regenza grischuna vesa plirs avantatgs en il diever da products cre-schids sin prads indigens ed elavurads en la vischinanza. Ella ha pri-piziun areguard la producziun regionala sin ina dumonda parlamentara da la fracziun dal cussegl grond da la Partida populara svizra.**

La fracziun da la pps ha vulì savair da la regenza grischuna sch'ella vesia en la promoziun da products regionalis in med adattà per sbassar las emissiuns dal gas carbonic e medemamain sustegnair l'economia regionala e per finir la populaziun. La bilanza dal CO<sub>2</sub> da mangiativas saja dependenta dal product sco tal, da las metods da producziun e dals transports, scriva la regenza en sia resposta. Il diever da products regionalis sa drizzia en quel connex en la dretga direcziun. La regenza regorda als ulteriurs aspects economic e da la societad ed è da l'opiniun ch'il diever da products regionalis saja generalmain d'avantatg. Els porschian als consumers ina vasta trasparenza, uschia che la durabladad possa vegnir giuditgada. In ulterior avantatg vesa la regenza en la chadaina da plivalur che restia uschia en il chantun e quai davent da la producziun enfin tar la vendita. Per quel intent è la regenza pronta da pre-tender dals furniturs dals agens manaschis da resguardar ils principis da la regiuna-

lità e sesiunalità dals products. La gastronomia dal Plantahof sco da l'Uffizi per l'execuziun giudiziala resguardia per spisas derivantas dad animals per gronda part products dals manaschis agriculs

chantunals. E quels manaschis mainian atgnas butias per far attent a la populaziun la valor da la producziun regionala. La gastronomia suttamessa a l'Uffizi per la furnaziun media-superiura sco la can-

tina dal manaschi da scolaziun per persunas dischoccupadas cumprian tant sco pussaivel tar furniturs regionalis e la protecziun da l'ambient saja tematisada, scriva la regenza.



**Via la promoziun economica**

Organisaturs che retraian daners publicis da la promoziun economica ston ademplir cundiziuns dad in concept da provediment e resguardar products regionalis uschè lunsch che quai è opportun e realisabel. En la resposta a la dumonda da la fracziun da la pps regorda la regenza a la promoziun entaifer las mesiras da svilup prioritarias. Sper alpinavera, la plattafurma da vendita da products regionalis, è pertutgada la collavuraziun tranter agricultra e gastronomia sco manaschis innovativs da la producziun e vendita da mangiativas. In'ulteriura pussaivladad sa dat, tenor la regenza grischuna, da cuntinuar cun il program Grischun Viva e medemamain cun ils parcs da la natira grischuns intimads entaifer la cunvegna da prestaziun dad augmentar la cumpart da products elavurads en la regiun.

**Il chantun dovra en sia gastronomia – p. ex. en praschuns ed al Plantahof – per gronda part charn e latg dal Grischun.**

FOTO Y. BÜRKL